

QVÆSTIO MEDICA

QVODLIBETARIIS DISPVATIONIBVS MANE DISCVTIENDA

IN SCHOLIS MEDICORVM DIE IOVIS X. IANVARIJ.

M. IACOBO RENAVT, Doctore Medico Præsidi.

An ventres hyeme & vere Naturâ calidissimi?

NON eadem est omnium corporis partium ratio, non eadem dignitas, omnes accommodatâ suis functionibus temperie Natura donavit, præcipuas eo situ collocavit, quò minùs paterent injuriis: principes tres numerantur, hepar, Cor, Cerebrum, in quibus elucet tres quæ corpus nostrum regunt facultates, naturalis, vitalis, animalis, quas ex his in reliquis influere non arbitramur, iis insitæ videntur in quibus functiones exercentur. In hepate, inferioris ventris parte nobiliori, viget naturalis facultas, in eo, non venarum sed proprij parenchymatis virtute, sanguis generatur spiritu proprio præditi, futurum partium omnium alimentum: etsi vita dicatur esse in sanguine, ipsum tamen vivere ne credas, quamdiu venis continetur pars corporis non est. In corde, lupenore ventre conclusa, sedes est vitalis facultatis, calidissimum viscum est ex arterioso sanguine conformatum, continuus est ejus motus, non animalis, sed naturalis, nulla pars est ejus cujus tantum sit robur, tanta in actione constantia, ejus functiones ita necessariæ sunt & manifestæ, ut plerique facultatum omnium principium crediderint, ejus potissimum ope, spirituum vitalium ministerio, insitus partium calor foveatur, atque ita vita conservatur. Cerebrum inter partes principes nobilissimum locum tenet, cum in edito loco constitutum injuriis magis obnoxium sit, offeo tegumento Naturæ providentiâ undique circumseptum est, in ejus solum medullâ, non in membranis, facultas animalis præcipuam sedem habet, sensum omnium motusque principium est, cum quovis aëre calidius deprehendatur, non videtur cordi refrigeranda destinatum.

IMPARES essent partes functionibus suis obeundis, nisi nativo calore abundarent. Is est naturalium omnium operum causa, præcipuum animæ instrumentum, rectè Natura nostra dicitur, quæ à nullo licet docta, omnia doctè facit: hujus permanente in humido vita definitur, eò diuturnior quò firmior utriusque connexio. Hunc ne putes simplicem qualitatem, substantia est humida, primigenia, calore & spiritibus perfusa, quæ copiosa est pinguis & pura non facile dissipatur, exsiccat, refrigeratur, atque ita injuriis tum internis tum externis potentius resistit: videre, audire, & alia Naturæ opera præstare rectè dices, at intelligere, scire omnia tum præsentia tum futura, non ita. Est-ne cœlestis vel elementaris naturæ? Propriè si loqui velis, nec cœlestis est nec elementaris, proprius est cuicunque viventi, vitalem rectius appellabis, nec è quatuor elementis homo creatus est, nec cætera animalia, nec plantæ, nec è cœlo quippiam deductum est quod illis permittum sit, hominis actiones (de eo potissimum loquimur cui conservando Medicina destinata est) supra naturam elementorum sunt, spiritalis Anima, incorruptibilis, immortalis, nobilior corpus exigebat cui jungeretur, nobilior instrumentum quo uteretur.

QVI calor est in utroque parentis secundo semine & materno sanguine, is verè innatus est atque primigenius, hujus qui crescunt plurimum habent, senes minimùm, hi paucis, illi plurimis egent alimentis, hi facile jejuniun ferunt, illi difficilè. Cum multus est in visceribus calor, multa requiruntur alimenta quibus foveatur, si degenentur, graviter offenduntur, quæ partim ab ambiente aëre, partim à nativo calore fit dissipatio, reparationem exigit, si deficiat, perire necesse est. Potest-ne homo diu sine alimento vivere? Tempus definiri non potest, non omnium idem est abstinuissè variis exemplis probatur, omnia quæ narratur nec leviter credimus, nec temerè rejicimus, difficilis ratio, sed experientiæ credendum est: lucernæ tanto artificio olim comparatæ sunt, ut per aliquot sæcula inconsumpto oleo flammam retinerent, an non simile quippiam in homine, qui parvus mundus dicitur, in tantâ temperamentorum diversitate & tot sæculorum spatio contingere potest in humido primigenio, ut per aliquot menses, annos vis dissipetur? Id quò fiat arduum est explicare, mirari licet, non nosse rationem, quæ non sunt artis, ab humore melancholico fieri probabile videtur.

MAGNA est atque admodum efficax vis aëris ad sanitatis vitæque rationem, eo spiritus nutriuntur, undique quæ corpora nostra subit, principium alimenti, spiritus, nares, os, guttur, pulmo, reliquæ transpiratio: continua est ejus necessitas, cibis, potibus, exercitiis, aliisque rebus quas non naturales appellant, diu sine noxâ abstinere possumus, aëre nullo temporis intervallo carere licet, tanta est ejus dignitas, ut quod Hippocrates in morbis divinum appellavit, Galenus aëris constitutionem dixerit. Vis intelligere vires ejus, orbem universum mente perlustra, attende quanta sit inter ejus incolas pro varietate regionum, ingenij, morum, virium, stature, valetudinis, vitæ diversitas, ut in eadem regione temporum mutationes sanitatem lædunt, aut tuentur, morbos pariunt, & solvunt. Insignes sunt & ordinariæ quolibet anno quatuor, hyems, ver, Æstas, Autumnus, has alij æquinoctiis & solstitiis distinguunt, alij astrorum quorundam & syderum ortu & occasu, pleiadum nempe, caniculæ, arcturi, fidiculæ: prior ratio constantior & notior est, non ita mutantur pro sæculorum & clymatum ratione æquinoctia & solstitia, ut ortus & occasus syderum, non ij nunc eodem quo Hippocratis tempore contingunt, nec in diversis climatibus iisdem nunc diebus. Æquinoctia & solstitia omnes norunt, pleiadum, caniculæ, arcturi, fidiculæ ortum & occasum pauci.

HYEMS frigida est & humida, si naturam suam servat salubris, servare autem non potest, nisi multum flaverint venti Aquilonij, quibus expositæ urbes *Χειμῆρος* sunt, humiditate suâ Æstatis atque Autumnij siccitatem emendat, frigiditate sanguinem & spiritus intrò repellit, eorumque dissipationem prohibet, ita vegetiori reddito nativo calore, perfectiores sunt Naturæ functiones, etsi frequentior addit plenitudo, quæ multorum morborum causa esse solet, minùs tamen frequentes sunt morbi, & qui contingunt, etsi longiores, minùs tamen periculosi. Si otiosus es, utere Galeni consilio, ejus exemplum sequere, exercitio nativum calorem auge, plenitudinem cave: Ver temperatum est, saluberrimum, nativum calorem nec intrò repellit nec dissipat, sed fovet, & per totum corpus æqualiter diffundit, sanguinis generationem promovet: pueri, adolescentes, & qui optimæ temperaturæ sunt, optimè habent, nulli male: qui contingunt morbi non sunt lethales, aliis temporibus radices egerunt, his natura expedire se aggreditur: cibi sicut hyeme & rarò & plenius possunt exhiberi, prudenter ejus initio aliquid detraheris, ut hyeme contracta plenitudo minuat, & si fortè crudior est, sanguis perficiatur. Æstas calida & sicca senibus & pituitosis utilis, humores quidem faciliè discutit, sed vires unâ dissolvuntur, dissipatio reparationem exigit, calorem visceribus exiguis coctioni non sufficit, hinc pauca alimenta sed frequentius sunt exhibenda. Autumnus siccus, in calore & frigore inæqualis, non tam aut temperamenti aut inæqualitatis ratione morbosus, quam quod æstati succedat, deficeret Natura, nisi superveniente hyeme, sanguinis & spirituum recursum, nativi caloris vires in visceribus crescerent, & vere tum in iis foveretur, tum ad exteriora sensum expanderetur: ita præteritis temporibus extenuata corpora reficiuntur, validiora sunt & habitiora, Naturæ opera omnia sunt præstantiora, nec fortè solum sanguinis & spirituum influentium copiâ majores sunt in interioribus corporis partibus insiti caloris vires, sed ejus etiam substantia augeri videtur.

Ergo ventres hyeme & vere Naturâ calidissimi.

DOMINI DOCTORES DISPVATVRI.

M. Nicolaus Morin.

M. Carolus Patin.

M. Philippus Chartier, Medicus & Professor Regius.

M. Franciscus de la Chambre, Ordinarius Regis Medicus.

M. Alanus Lami.

M. Claudius Quarrier.

M. Philbertus Morisjet.

M. Hermannus de Launay.

M. Philippus Harduinus de S. Jacques.



Proponebat Lutetiæ PETRVS YVELIN, Parisinus, A. R. S. H. M. DC. LXIX.